

- केन्द्रीय कृषि मंत्री शिवराज सिंह चौहान कह्यो-खाद्य सुरक्षा तैय करण अर किसानां री आमदनी बधावण माथे सरकार रो खास ध्यानं
- केन्द्र सरकार राज्यां मांय प्रवासी मजूराने मुहैया करायी जावण वाळी रसोई गैस री पांच किलोग्राम वजन री टंकियां रा रोजीना रा आवंटन ने दूणो करण रो फ़ैसलो कीनों
- उपराष्ट्रपति सीपी राधाकृष्णन कह्यो-इग्नू दूरस्थ हलकां मांय तालीम ने आसान बणायी-39 वां दीक्षांत समारोह मांय सवा तीन लाख विद्यार्थियां ने उपाधियां दीरीजीं
- प्रदेश मांय आंधी-बारिश रो दौर जारी-केई ठौड़ां ज़ोरदार बायरो बाजण सागे बारिश व्हीं

000

केंद्रीय कृषि अर किसान कल्याण मंत्रालय री ओर ऊं पहलो क्षेत्रीय कृषि सम्मेलन जयपुर मांय राख्यी ज्यो सम्मेलन मांय राजस्थान, गुजरात, महाराष्ट्र, मध्यप्रदेश अर गोवा रा कृषि मंत्री, आला अहलकार, किसान उत्पादक संगठनां रा नुमाइंदा अर प्रगतिशील किसान शिरकत कीनीं ईं मौके केन्द्रीय कृषि अर किसान कल्याण मंत्री शिवराज सिंह चौहान कह्यो के खाणपीण ऊं जुडी हिफाजत तैय करण अर काश्तकारां री आमदनी बधावण माथे सरकार रो खास ध्यान हैं खबरनवीसां सागे बातचीत करता थकां श्री चौहान कह्यो के खेती-बाडी ऊं जुड्या राज्यां रा मुद्दां माथे विगतवार चर्चा सारू ओ सम्मेलन राख्यी ज्यो अर ऐड़ा और सम्मेलन व्हेलां कृषि मंत्री कह्यो के आवता तीन महीना मांय देश रा सगळा किसानां रा पहचान पत्र बणावणो तैय करी ज्यो हैं

कार्यक्रम मांय मौजूद मुख्यमंत्री भजनलाल शर्मा किसानां ऊं पारंपरिक खेती-बाडी रे बजाय प्रौद्योगिकी आधारित खेती अर खेती रा नुवा तरीका काम लेवण बाबत् कह्यो वे बुवाई करी जावण वाळी साख अर खेती रा तरीका सारू खेती-बाडी रा वैज्ञानिकां ऊं राय लेवण सारू ईं कह्यो श्री शर्मा कह्यो के नीतियां बणावण वाळां ने खेती-किसानी री असल परेशानियां री जाणकारी व्हेवण परां ही किसानां रो विकास व्हे सकेलां

देश मांय पेट्रोल-डीजल, रसोई गैस अर पीएनजी री पूर्ति सामान्य हैं पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा नई दिल्ली मांय खबरनवीसां सागे बातचीत करता थकां कह्यो के किण ईं रसोई गैस वितरक केंद्र माथे पूर्ति मांय कमी री कोई सूचना नी हैं सुजाता शर्मा कह्यो के सगळा पेट्रोल पंप माथे तेल पर्याप्त मात्रा मांय मौजूद हैं वे कह्यो के रसोई गैस री टंकियां री ऑनलाइन बुकिंग रो करीब 96 फीसदी ग्राहकां ताई पूगा दियो ज्यो हैं सरकार राज्यां मांय प्रवासी मजूराने रोजीना दी जावण वाळी रसोई गैस री पांच किलोग्राम वजन री टंकियां री तादाद दूणी करण रो फ़ैसलो कीनो हैं ईं बीचे राज्य सरकार प्रदेश मांय रसोई गैस री पूर्ति माथे लगातार नज़र राख रही हैं पाली मांय रसद विभाग री ओर ऊं लोगां ने शुभ रा कारज मांय जरूरत सारू कारोबार मांय काम आवण वाळी टंकियां मुहैया करावण री पहल करीजी हैं ज़िला रसद अधिकारी कमल बतायो के ईं सारू लोगां ने शुभ रा काम री तारीख ऊं 10 दिन पैली ज़िला रसद अधिकारी रा दपतर मांय कंकु-पत्री सागे अर्जी देवणी व्हेलां वे दूजा ईंधन काम लेवण री अरज ईं कीनीं

उपराष्ट्रपति सी.पी. राधाकृष्णन कह्यो है के किणी ईं देश री असल ताकत वां री जनता रा ज्ञान, मूल्यां अर बूता मांय बसी व्हे हैं वे आज नई दिल्ली मांय इन्दिरा गांधी राष्ट्रीय मुक्त विश्वविद्यालय-इग्नू रा 39वां दीक्षांत समारोह मांय बोल रह्या हां श्री राधाकृष्णन कह्यो के इग्नू आसान शिक्षा रे ज़रिए पूरा देश ने जोड़ र तालीम रा हलका मांय मोटा बदलाव लायो हैं दीक्षांत समारोह मांय तीन

लाख 24 हजार ऊं बत्ता विद्यार्थियां ने उपाधियां दीरीजीं इग्नू रा क्षेत्रीय केन्द्र जयपुर मांय ई दीक्षांत समारोह राखी ज्यो, जिण मांय उपमुख्यमंत्री डॉ. प्रेमचन्द्र बैरवा ई शिरकत कीनीं

000

राज्य मांय जनगणना 2027 रा पहला दौर सारू आज मास्टर ट्रेनरां री सिखावण सुरू व्हीं 10 अप्रैल तांई चालण वाळा ई सिखावण कार्यक्रम मांय राज्य रा सगळा जिला ऊं आया 41 मास्टर ट्रेनर शामिल व्हे रह्या हैं जयपुर रा जनगणना कार्यालय ऊं नामित 33 मास्टर ट्रेनर ई सिखावण ले रह्या हैं कार्यक्रम रो उद्घाटन करता थकां मुख्य सचिव वी. श्रीनिवास सिखावण ले रह्या सगळा लोगां ने पूरा उमाव ऊं सिखावण लेवण सारू कह्यो खबरनवीसां सागे बातचीत करता थकां मुख्य सचिव कह्यो के जनगणना 2027 पूरी तरह डिजिटल तरीका ऊं करी जावेला, इण मांय केई नुवा काम व्हेलां

.....

ध्यानजोग है के जनगणना-2027 रा पहला दौर मांय मकानां री लिस्ट बणावण अर गिणती रो काम कर्यो जावणो हैं

000

राज्य मांय 8वीं ऊं 12वीं कक्षा तांई रा विद्यार्थियां मांय कानूनी जागरूकता बधावण सारू राजस्थान राज्य विधिक सेवा प्राधिकरण-रालसा री ओर ऊं खास अभियान चलायी ज्यो हैं ई रे जरिए विद्यार्थियां ने संवैधानिक मूल्यां, अधिकारां अर कर्तव्यां री जाणकारी दी जावेलां रालसा रा सदस्य सचिव हरिओम अत्री बतायो के अभियान रा तैत विद्यार्थियां ने हर मंगलवार ने कानूनी प्रावधान अर अधिकारां रा बारा मांय विगतवार जाणकारी दी जावेलां ई सारू प्रदेश रा करीब 1 हजार 400 न्यायिक अहलकार स्कूलां मांय जा र विद्यार्थियां मांय जाग जगावेलां

.....

आज सुरू व्ह्या युवा सशक्तिकरण कार्यक्रम रा तैत विद्यार्थियां री समस्यावां दूर करण सारू स्कूलां मांय कोर्ट वाली दीदी नाम ऊं खास शिकायत अर सुझाव पेटियां लगायी जावेलां विद्यार्थी खुद ऊं जुड़ी कोई ई शिकायत इण मांय दे सकेलां अ पेटियां रालसा रा लेवल माथे खोल र शिकायतां रो निपटारो कर्यो जावेलां

000

आज विश्व स्वास्थ्य दिवस मनायी ज्यो इण रो ई साल रो मुद्दो "टुगेदर फॉर हैल्थ स्टेण्ड विद साइंस" राखी ज्यो विश्व स्वास्थ्य दिवस रे मौके आज जयपुर रा राष्ट्रीय आयुर्वेद संस्थान मांय आयुर्वेद अधिवेशन अर सम्मान समारोह राखी ज्यो ई दौरान आयुर्वेद रा महत्त्व, भारतीय चिकित्सा पद्धति री वैज्ञानिक परम्परा अर स्वस्थ समाज बणावण मांय इण रा काम रा बारा मांय चर्चा करीजीं कार्यक्रम मांय उप मुख्यमंत्री अर आयुष मंत्री डॉ. प्रेम चन्द्र बैरवा ई शिरकत कीनीं ई मौके आयुर्वेद रा हलका मांय चोखो काम करण वाळा विद्वानां अर डॉक्टरां रो मान करी ज्यो

0000

प्रदेश मांय आंधी-बारिश रो दौर आज ई चालतो रह्यो अर केई जिलां मांय आज ई जोरदार बायरो बाजण सागे बिरखा व्हीं सवाईमाधोपुर, बारां, डीग अर भरतपुर जिलां मांय दोपहरां पाछे आंधी चालण सागे झमाझम बरसात व्हीं भरतपुर मांय चाली आंधी ऊं केई ठौड़ां रुंखड़ा उखड़ ग्या अर होर्डिंग्स उड़ ग्यां जालौर मांय दोपहरां पाछे आंधी चाली अर गहरा बादळा मंड ग्यां कोटा अर आरे-सारे रा हलकां मांय आखा दिन कदी तावड़ो निकळ्यो तो कदे बादळा मंड्या अर छांटो-छिड़को व्ह्यो बाड़मेर मांय आज लगातार दूजा दिन चाली आंधी ऊं जिन्दगी माथे असर पड्यो समाचार मांडया जावण री बगत जयपुर मांय ई बिरखा व्हे रही हीं ई बीचे मौसम केंद्र जयपुर आज प्रदेश रा 15 ऊं बत्ता जिलां मांय आंधी-बारिश व्हेवण अर कठे-कठे ओला पड़बा सारू चेतायो हैं केंद्र रा निदेशक राधेश्याम शर्मा बतायो के घणखर जिलां मांय आंधी-बारिश रो दौर काल दोपहरां तांई चालण री संभावना हैं

.....

सामाजिक न्याय अर अधिकारिता मंत्री अविनाश गहलोत कह्यो है के राज्य सरकार अति पिछड़ा वर्ग रो भलो करणो तैय कीनो हैं वे आज देवनारायण योजना रा तैत चलायी जा रही योजनावां अर

कार्यक्रमां री प्रगति रो जायजो लेवण सारू राख्यी ज्यी मीटिंग मांय बोल रह्या हां श्री गहलोत कह्यो के हाल ही मांय ऐलाण करी ज्या 10वीं अर 12वीं कक्षा री परीक्षावां रा नतीजा मांय छात्रावासां अर आवासीय स्कूलां मांय रह र पढ रह्या विद्यार्थी बेहतरीन नतीजा दीनां

000